

Informe Especial

LAGO PREPARANDO PA CIERRE

ORANJESTAD(AAN)—Na e situacion no por ripara mucho cambio. Trabaonan di limpieza y mantencion ta continua; tur cos ta intacto y por mira trahadornan di Lago y trahadornan di contratista ariba e tereno. Sinembargo, Lago ta preparando pa ciere. DIARIO a discuti cierto aspectonan di interes general y a busca contesta ariba preguntanan cerca un informante clave, pa awe por trece e informenan na un forma especial.

Trabao ta continua ariba tereno di Lago, caminda e proximo temponan lo sigui mira movicion. Pasobra aunke e trahadornan lo baha dia 31 di Maart, ora e planta cera su portanan oficialmente, contratistanan lo keda encarga cu e trabaoonan di limpieza y mantencion. Actualmente ya un cantidad considerable di trahadornan di e contratistanan ta realizando e labornan necesario ariba tereno di Lago, cu ta cambiando su equipo pa por bay duna e servicio cu lo ser exigí den futuro.

Lago ya lo no bay produci, pero lo bira un centro di venta di varios producto, cu lo ser importado. Productionan cu pa e publico local tabata localmente alcanzable, pero cu awor mester ser importa, almacenan pa despues er bendi na publico di Aruba.

GASOLIN PA CUBRI VARIOS LUNA

Pa automobilistanan na Aruba e entrega di combustible na pomp station tabata algo automatico, cu solamente a mira problema ora algo a pasa cu e calidad di combustible o na momento di un o otro accion cu a paraliza venta. Sinembargo awor e gasolin mester ser importa y hopi ta esnan cu ta puntra nan mes si lo tin basta gasolin pa cumpli cu e demanda local na un forma aceptable.

Segun informantenan na momento cu e refinaria cera, lo tin basta gasolin pa por acomoda e demanda publico durante e periodo di por lo menos seis luna.

Tankinan a ser adapta pa nan papel nobo di almacenar e combustible cu den futuro lo ser importa.

Ya e promer importacion di combustible pa avion a ser importa y tambe den e caso aki ta tene cuenta cu un provision pa cubri por lo menos seis luna.

DEMANDA PA GASOLIN A BAH

Den e almacenaje di gasolin naturalmente ta tene cuenta cu e demanda local, cu a baha, segun e informante a bisa DIARIO.

Te cu aña 1984 por a mira un linea di aumento den venta di gasolin na Aruba, cu sinembargo a registra un caida di 0,9 por ciento na aña 1984 pa loke ta trata e gasolin cu ta ser compra ariba mercado local.

E tendencia cu ta continuando, lo tin su raiz den algun hechos. Asina automobilistanan ta haci uso mas conciente di nan auto, mientras cu tambe e cifranan di cantidad di autonan cu ta ser bendi ta demostra cu e cantidad di auto ta bahando.

Ademas publico local actualmente ta preferando e tipo di auto cu ta mas eficiente den uso di gasolin esta cu ta usa menos gasolin.

Demanda pa Diesel a aumenta algo, pero no na forma remarcable.

Pero pa acomoda e demandanan local pues lo pasa pa importacion, cu lo significa naturalmente cu prijs lo aumenta. Paso-bra lo mester bay cubri e gastonan di importacion, cu te awor no tabata e

caso.

AUMENTO DI PRIJS DI GAS

gas tambe lo bay conoce tarifanan mas alto, aunke no tan alto manera ta ser specula.

E informante a mustra DIARIO cu mientras e planta tabata refina azeta, gas tabata un asina yama producto secundario. E tabata ser haya for di e destilacion di azeta.

Pero awor lo mester bay importa gas y lo mester haci uso di bapornan especial, cu ta significa costo adicional na momento cu cuminsa haci uso di nan servicio. Lo mester paga pa servicio di haf, di handling, etc., loke lo significa cu e costo pa venta lo subi y loke lo refleja den e prijs di venta. Sinembargo Exxon lo bay tene cuenta cu un que otro y e informante a desmenti cu e prijs lo bira 80 florin manera ta ser specula.

FACILIDADNAN CU TA KEDA ATRAS

Lago no tabata solamente un planta, pero Lago tabata tambe tur e facilidadnan cu tabata rondone.

Asina Lago tabata tambe lowua recreation center, cu segun informenan lo por sigui conta cu un subsidio di Lago.

Eso Club lo permanece habri, pero lo bay introduci un gerencia nobo. Ta ser spera cu lo por usa e staff cu ta keda atras pa marketing pa dirigi e centro aki tambe.

Proximamente por spera cu e entidad nobo a keda forma, segun informante di DIARIO.

E grupo aki tambe probablemente lo keda encarga cu e casnan den Colony, cu ta ser poni na venta.

Actualmente e casnan ta ser restora, y lo ta intencion pa na promer lugar empleadonan di Lago haya oportunidad pa compra e

casnan aki. Segundo opcion ta pa e pensionadonan mientras cu luego publico tambe por compra uno di e casnan.

Falta poco pa dia 31 di Maart. E trahadornan ta conciente, y mientras e trahadornan di contratista por lo pronto lo tin basta limpieza di haci, e trahadornan di Lago ta preparando pa e momento cu e refinaria cera su portanan definitivamente.

ALGO MAS CU UN REFINERIA

Lago no tabata solamente un refinaria. E tabata tambe un forma di bida pa su empleadonan, cu mester acostumbra cu e idea cu Lago ta cera.

"No tin placa pa reemplaza trabao", a ser bisa na DIARIO. Empleo na Lago tabata significa entrada tur luna; seguridad pa futuro pa e trahador y pa su familia; seguridad den beneficiacion cu lo desaparece.

Esnan cu no ta bini na remarke pa pensioen, lo mester conta por lo pronto unicamente cu e man yen di placa for di cual nan mester biba. Pero un entrada fijo lo no tey mas.

Pa a bini na remarke pa pensioen un empleado di Lago mester tabata tin 50 aña di edad, pa cuminsa haya su pensioen y pa un pensioen completo e mester a cumpli 60 aña di edad. Tambe tabata tin e posibilidad cu un persona di cierto edad, cu 20 aña di servicio por a haya pensioen. Pero tin un grupo cu no a califica y pa nan ciere di Lago ta significa ciere di e fuente continuo di entrada.

Cu e placa cu nan ricibi nan lo mester biba por lo pronto, mientras futuro no duna seguridad.

E servicio medico cu a bira tradicional na Lago tambe ta desaparece. Trahadornan ta cera aseguro

individual, y e unico alieno ta cu Alico a priminti cu e lo asegura tur hende sin tene na cuenta cu cierto personanan normalmente lo no a califica pa seguro. Pero semper lo mester tene cuenta cu e gastonan lo ta a base individual tambe.

Pa e fundacion pa trahacas propio a yega na un areglo cu Lago, pero estudiantenan lo mira e posibilidad di becanan bay perdi. Esnan cu ya tin un beca lo por termina nan estudionan, pero esnan cu a soño cu un futuro a base di un beca di Lago, mester comprende cu e soño difícilmente lo por ser realiza.

BUSCA OTRO FUENTE DI ENTRADA

Empleadonan di Lago a haya nan mes ta busca otro fuente di entrada. Lago a asisti nan y asina a bini Aruba un grupo especializa di Estados Unidos, cu a siña e trahadornan di Lago con nan mester acerca posible doñonan nobo di trabao. E forma di solicita, con pa compila un carta di solicitud, un resumen a ser splica den cursonan cu a significa hopi gasto.

Diferente sesion a ser teni na e trahadornan cu tambe a ser recomenda na otro refinarianan den exterior.

Detayes encuanto e trahadornan a ser manda pa Esso Hulanda cu e speranza cu por a duna nan trabao, pero esaki no a duna mucho resultado. Entre diez pa 20 persona lo por conta cu un empleo na Hulanda a base di e intento aki.

E resto ta keda en busca di trabao. Pasobra aunke nan retira cu un man yen di placa e suma aki lo no por reemplaza empleo, manera nan a bisa DIARIO, mustrando cu Lago mas cu un fuente di entrada tabata un forma di bida.